

不違持好 一切善惡 皆由心造

為善者福 為惡者禍 急急如

天專律令初

靈寶天尊說洪恩靈濟真君妙經

洞玄靈寶自然九天生神章經 人三

三寶大有金書

天寶君者則洞玄之尊神靈寶丈人則靈寶君之祖炁也丈人是混洞太無元高上玉虛之炁九萬九千九百九十億萬炁後至龍漢元年化生天寶君出書時號高上大有玉清官

靈寶君者則洞玄之尊神靈寶丈人則靈寶君之祖炁也丈人是赤混太無元玄上紫虛之炁九萬九千九百九十九萬炁後至龍漢

開圖化生靈寶君經一劫至赤明元年出書度人時號上清玄都玉京七寶紫微宮

神寶君者則洞神之尊神神寶丈人則神寶君之祖炁也丈人是冥寂玄通元无上清虛之炁九萬九千九百九十萬炁後至赤明元

年化生神寶君經二劫至上皇元年出書時號三皇洞神太清太極宮此三號雖年殊號異本同一也分為玄元始三炁而治三寶皆

三炁之尊神號生三炁三號合生九炁九炁出乎太空之先隱乎空洞之中無光無象無

形無名無色無緒無音無聲導運御世開闢玄道三色混沌乍存乍亡運推數極三炁開光炁清高澄積陽成天炁結凝津積滯成地九炁列正日月星宿陰陽五行人民品物並受生成天地萬化自非三元所育九炁所導莫能生也三炁為天地之尊九炁為萬物之根故三合成德天地之極也人之受生於胞胎之中三元育養九炁結形故九月神布炁滿能聲聲高神具九天稱慶太一執符帝君品命主錄勅籍司命定算五帝監生聖母衛房天神地祇三界備守九天司馬在庭東向讀九天生神寶章九過男則萬神唱恭女則萬神唱奉男則司命敬諾女則司命敬順於是而生九天司馬不下命章萬神不唱恭諾終不生也夫人得還生於人道灌形太陽驚天駭地貴亦難勝天真地神三界齊臨亦不輕也當生之時亦不為陋也所以能愛其形保其神貴其炁固其根終不死壞而得神仙骨肉同飛上登三清是與三炁合德九炁齊并也但人得生而自不能尊其炁貴其形實

其命愛其神自取死壞離其本真耳九天生神章乃三洞飛玄之炁三合成音結成靈文混合百神隱顯內名生炁結形自然之章天寶誦之以開天地之光靈寶誦之以開九幽長夜之魂神寶誦之以制萬靈太一誦之以具身神帝君誦之以結形九天誦之以生人學士誦之以昇天鬼靈聞之以昇遷凡夫聞之以長存幽魂聞之以開度枯朽聞之以發烟嬰孩聞之以能言死散聞之以還人三寶神與萬品生根故非鬼神所知凡夫所聞也夫學上道希慕神仙及得尸解滅度轉輪終歸仙道形與神同不相遠離俱入道真而無此文則胞胎結滯死炁固根真景不守生炁無津九戶闔塞體不生神徒受一形若寄炁而行學得此法可坐致自然三寶尊重九天至真秘之大有九重金格紫陽玉臺自非天地一開其文不出元始禁書非鬼神所聞竊之者風刀萬劫魂死無生依科遵奉形神同仙三元官中宥有金名紫字刻書來生應為三清神仙之人當得此文有其緣會當齋金

實奉師効心依科盟受閉心奉行慎勿輕泄風刀考身修行之法十日長齋不關人事諸塵漏盡衷心默念清香執戒入室東向叩齒九通調聲正炁誦誦寶章誦之一過聲聞九天誦之二過天地設恭誦之三過三界禮房誦之四過天王降仙誦之五過五帝朝真誦之六過魔王束身誦之七過星宿停闡誦之八過幽夜光明誦之九過諸天下臨一切神靈莫不衛軒一過徹天胞原宣通二過響地胎結解根三過神禮魂門煉仙四過天王降仙魄戶閉關五過五帝朝真藏府清涼六過魔王伏諾胃管生津七過星宿朗明孔竅開聽八過幽夜顯光三部八景整具形神九過諸天下臨三關五藏六府九宮金樓玉室十二重門紫戶玉閣三萬六千關節根源本始一時生神九過為一遍一遍周竟二界舉名五帝友別稱為真人十遍通炁制御萬靈魔王保舉列上諸天百遍通神坐致自然太一度符元君受生千遍通靈坐在立亡仙童玉女役使東西萬遍道備馳騁龍駕白日登晨

元始天專時靜處閑居偃息雲宮黃房之內七寶幃中照爽養素空碧練真耽咀洞慧俯研生神理微太混嘯朗九天是時飛天大聖無極神王玉輔上宰四協侍晨清齋建節侍在側焉憑瓊顏而妙感仰靈眸而開襟竊神章而踴躍餐天音而蒙生敢乘機而悟會冒靈眇而披心於是飛天大聖無極神王前進作禮稽首而言上白天尊賤臣幸會得仰侍靈軒不以短狹叨渥冥津重悟凝玄位登神王總御生死領括天僊賞監七覺遠覽遐方雍觀上宰對司侍晨方當乘機應命履九太陽洞理陰符撫掌兆民大運將期數終甲申洪流蕩穢凶災彌天三官鼓筆料別種人考算功過善惡當分自赤明以來至上皇元年依元陽玉匱受度者應二十四萬人開皇以後數至甲申諸天選序仙曹空廢官條不充遊散職司皆應選人依元陽玉曆當於三代更料有心積善建功為三界所舉五帝所保名在上天者取十萬人以充其任又當別舉一十二萬人以充儲官如此之例或以宿名

玄圖或以骨像合仙或以減度因緣轉輪或以篤好三寶善功徹天或供養三寶為三官所稱或修齋奉戒功德積感或施散財寶建立道堂或救卹窮乏濟度天人或為三師建功充足天官有名考簿錄三官相應皆逆註種名上下有別毫分無遺又九幽之府被東華青宮九龍符命使拔九幽玉匱男女死魂宿名有善功德滿足應受開度者取三十二萬人以充甲申驅除之後開大有之民當此之時生死交會善惡分判得過者真為樂哉然三官相切文墨紛紜龍門受會鳥母督仙萬聖顯駕晝夜無閑功過平等使生死無偏此之昏闇亦臣之憂矣大期既切觸事關替恒恐一旦受罹公門伏聞天尊造大慈之化垂憐蒼生開九天之奧以濟兆民明科有禁戒非賤臣所可參聞然大數有期甲申垂終運度促急大法宜行役有心者得於芳筭之中聞於法音開示於祝嘏勸化於未悟者也緣茲上陳懼觸天顏願見哀愍賜所未聞於是

天尊撫几高抗凝神遐想仰誦洞章嘯詠琳琅良久忽然歎曰上範虛漢理微太幽道達重玄烝冠神霄至極難言妙亦難越子既司帝位受任神王飛天翼於瓊闕四宰輔於明輪遊眎極覽領綜無窮雍和萬化撫料蒼生今大運啓期三五告辰百六應機陽九激揚洪泉鼓波萬災厲天四官選舉以充種氏三代昏亂善惡宜分子當勞心兆庶疲於三官興廢之際事須開能今以相委其勉之焉實書妙重九天靈音施於上聖非鬼神所開明具有格四萬劫一行今冒禁相付子秘之矣慎勿輕傳登命九天司馬侍仙玉郎開紫陽玉笈雲錦之囊出九天生神王章四輔列位五老監真太一命辰玉帝唱盟一依俯仰明真真典南向長跪以付飛天無極神王法事既畢諸天復位

躬篇目九祖同仙當採擇其人應為仙者七百年中清齋十日齋金縉誓心依盟以傳慎之則事祚漏之則禍臻享祚則福延九祖德重山海招禍則考流億劫痛於毒湯風刀相刑可不慎之焉

始青清微天寶章
元始洞空無 三炁精上門 紫容觀太空
四明植靈根 妙化發東瓊 三翩起西崑
號應九玄清 五華帶錦雲 誰羅煥神燈
七精耀北玄 飄飄上清畿 奕奕帝一尊
落落高上章 羽童何紛紛 流香本無色
洞入萬仙羣 左迴三流劫 右轉九天關
金華纓玉童 八風舞空輪 四時無停機
青白早明分 九九改劫運 三三度一春
天地有終會 祕激歸在醜 洞明正一法
嚴修六天文 太平返空無 奉翊後聖君
元白禹餘靈寶章
靈風起西門 錦雲生東瓊 三炁燦玉洲
流香乘東輕 玉華披風散 倏忽朗九清
霖林耀朱日 黃水逐月生 中有採芝童

衣羽戴飛青 廳景萬領風 逍遙宴綠蟬
 總御九空輪 逆開萬緒程 左命三天文
 右攝六天兵 檢悉返空洞 六度應運候
 劫運自有會 誰測敗與成 弘波輪靈置
 六合無遺形 白屍深長流 孤魂因復靈
 悲此去來際 乃覺正法明 至學加精修
 東華結瓊名 欣有白簡人 相與樂太平

玄黃太赤神寶章

洞開運天綱 五炁輪三微 紫戶吐瓊簡
 金門納神輝 八會交真風 晃朗重明關
 天際九清外 落落高神迴 三色返空無
 四候應玉畿 河侯已鼓筆 五行潛相推
 六度無終劫 運極乘炁歸 萬虎羅天布
 羣兇竟吐威 兆民負災衝 積屍令人悲
 妙哉正法文 理劫明不棄 至時奉相迎
 契在九天飛 與爾期太平 放心無翻飛
 鬱單無量天生神章第一帝具胞命
 元元一黃演之炁
 混合空洞炁 飛奕浮幽寒 延康無期劫
 眇眇離本條 苦魂沉九夜 乘晨希陽起

真胎命元洞冥紫戶之炁

大有通玄戶 鬱單降晨霄 黃雲映靈府
 陰陽系象交 胞元結長命 惡根應化消
 桃康合精延 二帝秀玉飄 灌漑胞命門
 精練神不彫 九天命靈章 生神神自起
 元君過死路 司馬誦洞誥 一唱萬真和
 九遍譜天朝 稽首恭劫年 慶此榮舊由
 上上禪善無量壽天生神章第二帝
 無量結紫戶 炁尊天中王 開度飛玄爽
 變化輪空洞 故根離苦愛 緣本思舊宗
 幽夜淪還劫 對盡大運通 帝具始明精
 號曰字元陽 櫻兒伯史華 結胎守黃房
 新根斷死戶 照願養櫻童 禪善導靈炁
 玄哺飛天芳 華景秀玉質 精練自成容
 務宜育上生 羅列備明堂 太虛感靈會
 命我生神章 一唱動九玄 二誦天地通
 混合自相和 九遍成人功 大聖慶元吉
 散華禮太空 諸天並歡悅 一切稽首恭
 梵監須延天生神章第三帝真魂命
 元長靈明仙之炁

須延總三雲 玄元始炁分 落落大苑布
 華景翠玉尊 明梵飛玄景 開度長夜魂
 遊奕赴期歸 炁悉返故根 大帝號陽堂
 字曰八靈君 九開綠迴道 胎炁生上元
 陵梵度命籍 太一輔精延 泥丸敷帝席
 三部八景分 魂生攝遊炁 九轉自成仙
 瓊瑤九天音 玉章生萬神 三編列正位
 炁參八辰門 玄關過死戶 靈鎮津液源
 應會感靈數 明道潛迴輪 慶此櫻兒號
 稽首讚洞文

寂然究術天生神章第四帝真魂命

寂然無色宗 究術抗大羅 靈化四景分
 萬條翠朱霞 遊魄不顧反 一逝洞羣魔
 神公攝遊炁 飄飄練畫華 榮秀椿劫期
 乘運應靈圖 空洞生神章 瓊音逸九霞
 一唱萬真會 審美合成家 九轉景靈備
 鬱鬱唯玉葩 究術闢大有 一慶事作多
 上聖迴帝駕 櫻兒款以歌 不勝良晨會
 一切稽首和

波羅尼密不驕樂天生神章第五帝

真藏府命元五仙中靈之炁

翻翻五帝駕 飄飄玄上門 遊步黃華野
迴靈驕樂端 採集飛空景 舊莫多不存
太微迴黃旗 無英命靈落 攝召長夜府

開度受生魂 公子輔黃寧 總錄具形神

五章洞幽靈 五轉天地分 炁練元藏府

紫戶自生僊 數周衆真會 啓陽應感繁

玉女灌五香 聖母慶萬年 三界並歡樂

稽首禮天尊

洞元化應聲天生神章第六帝真靈

府命元高真冲融之炁

應聲無色界 霄映冠十方 迴化輪無影

冥期趣道場 靈駕不待嚮 朗然生神章

空洞諒无產 玄爽亦為疆 鍊胎返本初

長乘飛玄梁 斬畜喪天真 散思候履常

斬伐胞樹滯 心遊超上京 願會既玄玄

悟我理兼忘 介福九天端 文禮地良良

混化歸元一 高結元始王 稽首傳靈運

長謝蒼塵張

靈化梵輔天生神章第七帝真元府

命元高僊洞笈之炁

玄會統無差 混炁歸梵輔 務歡運靈化
潛推無寒暑 黍數構貞餘 振袂拂輕羽
瓊房有妙韻 汎登高神所 圓輪無停映

真仙參列序 上上霄衢逸 洞元深萬巨

秀葉翳翠霞 停陰清泠渚 遊翫怡五神

繁想嘯明侶 五難緣理去 冲心自怡處

爽魂隨本根 疊疊空中佇 七誦重關開

豁滯非神武 運通由中發 高唱稽首舉

高虛清明天生神章第八帝真華府

命元真靈化凝之炁

清明重霄上 合期慶雲際 玉章散冲心

孤景要靈會 煥落景霞布 神矜虛不邁

玉條流逸翠 從容虛妙話 靈音振空洞

九玄離幽裔 感爽無凝滯 去留如解帶

明識生神章 高遊無終敗 玄景睢雲衛

跡超神方外 應感無方圓 聊以運四大

研心稽首誦 乘聖共稱快

無想無結無愛天生神章第九帝真

神府命元自然玄照之炁

無結固無情 玄玄虛中澄 輪化無方序
數來亦巨乘 誰云無色平 峨峨多丘陵
冥心縱一往 高期清神微 良過非年歲
劫數安可稱 浮美緣故條 返胎自有恒

靈感洞太虛 飛步霄上水 津趣鼓萬流

潛凝真神登 無愛固無愛 高觀稽首昇

太極真人頌二首

大道雖無心 可以有情求 佇駕空洞中

迴盼翳滄流 淨明三界外 蕭蕭玉京遊

自無玄挺運 誰能悟冥趣 落落天漢澄

俯仰即虛柔 七玄散幽裔 返胎順沈浮

冥期苟潛凝 陽九無虞憂 觀此去來會

時復為淹留 外身而身存 真仙會良儔

壹壹玄中趣 湛湛清漢波 代謝若旋環

椿木不改柯 靜心念至真 隨運順離羅

感應理常通 神識達自徂 淡遊初無際

繁想洞九霄 飛根散玄葉 理反非有它

常能誦玉章 玄音徹霄返 甲申洪災至

控翻王母家 永享無終紀 豈知年初多

洞玄靈寶自然九天生神章經終

八二

十二

誦經應驗

蜀青城山乃神仙會府昔蜀主孟昶往祈見女真麻姑致齋壇側青城今有獻美女張氏遂納之名之曰麗華同處于丈人觀忽一夕迅雷掣電暴雨狂風掀拔屋宇騰空散落張氏遂殞命莫山下後數十年上元節丈人觀道士李若冲夜歸憇於山前忽竹陰有一女子號泣而出詣若冲前賦詩云獨卧經秋墜鬢蟬白楊風起不成眠澄思往日椒房寵級濕衣襟搗翠鈿言訖復泣而退若冲還觀見丈人殿上有衣冠朱履之士皆面北立如有奏對殿下廊廡間列諸罪人見獄卒引一女子繫於鐵柱杖之號叫痛楚徐察之乃山前途之者俄頃善神以劍指若冲曰今夕上元天官自五嶽丈人校勘生死罪目不宜久立若冲乃潛避達旦具白其師唐洞卿唐曰汝知之乎此乃張麗華也昔寵幸於此墜瀆上真致獲斯罪既以詩告汝汝當救之曰何法可救曰但轉九天生神章九卷奏金錄

八二

十三

自簡可免斯苦即自託生偶遇臨邛牧田魯備設黃籙若冲遂置簡書疏轉經十過投仗際所因而救度詣至九卷適丁焚簡之時若冲即回向而焚之明日張氏所葬之地有沙字四句云符吏惠忽扣夜局便隨金簡出幽冥蒙師薦拔息非淺領得生神九過經若冲請觀
太上垂教憫諸衆生故立救拔之門以濟生死之路嗚呼世人欲濟度先亡者誠當崇此理文為起脫之捷徑謹書于經末以為崇奉之勸云